

四庫全書

集部

欽定四庫全書

閩中十子詩卷十

明 袁表

馬熒 編

高待詔集一

五言古詩

儲御史

光義

田家雜興

野老安貧賤力作不辭苦把鋤行晨風南山看禾黍今  
秋穀稍登方思廣場圃歸來茅簷下團團聚兒女落日

在西山悠然望孤渚  
昨宵天始寒蟲聲滿籬戶  
田家衣食薄黽勉歲時取  
掩關未成眠東鄰響機杼

岑補闕參同諸公登慈恩寺浮圖

香界出塵表孤標屹崢嶸  
直上凌半空言是羽翼成  
迴梯接元氣磴道盤青冥  
雄觀隘川岳乃覺形神輕  
俯視寒渭白平臨終南青  
神州落掌中雙闕雲端明  
窮厯諸劫盡颯然涼飈生  
千峯掛飛雨秦塞何淒清  
鴻鴈來嗷嗷五陵鬱亭亭  
早割區中緣永懷參道情  
今日高興盡

期君謝浮名

劉隨州

長卿

江中晚釣寄荆南一二相識

楚水東去遠故人離別心登舟望落日岸絕荆門陰晚  
櫂向孤嶼收綸度前林天寒大澤暝鳥沒長淮深十載  
夢烟波幽期共投簪白鷗故友待向我如招尋眇眇初  
月色嗷嗷飛鴻音相思若千里遙寄滄浪吟

韋蘇州

應物

西郊燕集

原野穀雨霽熙陽麗芳辰良遊出西郭集我平生親野

酌藉芳草飛花落衣巾時聞幽鳥哢復眺羣山新  
倦此不盡歡行當念徂春同心勿睽離願言保其真

寫雲林清隱圖并題贈方致遠歸連川

謝公雲林隱乃在雲林樂了知雲林外丹青有丘壑  
要我袖中毫解衣共盤礴興酣不自惜烟霞生掌握  
浮天開蓬壺縮地走恒霍水與元氣連山將空濛鑿  
長松老不死瑤草寒未落直視萬里外但見雲漠漠  
飄蕭林下士昂藏如野鶴金澗漱靈泉石牀掇仙藥  
松喬相招邀

仝期共歡謔澹然靈臺間片塵元不著我亦遺世者雲  
林久栖薄逢君龍門下傾蓋便如昨幽意正浩蕩離心  
忽蕭索緘圖寄相思相思在寥廓

與林九龍門夜宿遲明贈別兼寄周一玄

江郭梅已白飛霜肅嚴冬故人惜短景握手龍門東羣  
壑倏暝色虛亭寒夜空明燈照孤月相對情未終明發  
忽惆悵拂衣如飄風長天西北傾三山落雲中中有澹  
蕩人孤高含清真三年濶風采百里悲胡秦前日遊遠

方登堂別巖親出門向西笑逸氣凌秋旻雪度日邊棹  
風吟江上蘋清詩落吳楚此地生陽春郢曲和者稀劍  
歌不復陳歸來使酒氣酒酣氣益振青樓喚歌舞日見  
羅衣新却笑相如宅淒涼四壁塵交歡徒結面肝膽向  
誰陳因子寫遠意風期越江濱

送李從軍歸永寧衛

大漢威遠服桓桓飛將軍數奇名不朽列侯安足云遂  
使貌虎士至今揚清芬吾子振先聲不徒誦典墳時平

尚武備投筆幕前聞挾矢射海月操戈入瘴雲島夷竄  
要荒窮髮無侵氛幕府敢論事還家捧檄文鐵衣拜高  
堂王事豈辭勤矯首望溫陵南天日已曛銜杯駐征馬  
相對惜離羣我有繞朝鞭片言贈臨分英雄起忠孝行  
矣收奇勲

題祝九齡桃花潭送別圖

二月潭上綠桃花笑人紅花飛逐流水漂忽無西東詞  
客惜別離看花駐孤蓬故人一斗酒不啻醉新豐所以



感激情酣歌吐心胸歌竟別更苦水深意無窮至今宣  
城下往往探奇蹤不聞踏歌聲但見寒潭空祝生青雲  
士妙年志桑蓬願接天仙遊師從浮丘公潭津送行舟  
情與汪倫同嘆息古人去披圖挹清風

答陳滄洲留別之作

海上春欲暮樓頭花滿林一尊風雨夕千古幽期心平  
旦忽惆悵愴然惜離襟踟躕歌白雪留贈比黃金十日  
不盡歡臨歧徒悲吟舉目望霄漢浮雲蔽重陰滄洲渺

何許春水洪濤深此別非萬里無時間徽音心搖天際  
樹思絕雲中岑以我子猷船期君安道琴母為嘆白髮  
歲晚重招尋

賦得劍水仙舟送曾彥斌司倉秩滿之京

劍水東去遠仙舟西上勞長風吹別心浩蕩層瀾高悵  
然溪上雲蒼茫雪中路兩鷁飛闔天一帆指吳樹停橈  
富春渚鼓枻錢塘潮樓望閭闔佳氣滿丹霄三月楊  
花飛白門春酒熟河上聞竹枝滿船歌此曲懸知課最

日正是相思時惟因流水意千里寫心期

建州芮太守敬亭山房詩

吾愛謝宣城留連敬亭作遺音落江海茲山齊五岳至  
今隱淪人往往來栖託夫子接風期千齡宛如昨逸氣  
鍾英靈奇才凌巘岬隱身卧綠蘿一室依巖壑兩峰控  
雙流芙蓉鏡中落空翠入几席清暉卷羅幕有時咏松  
泉迴視青山郭長嘯起白雲解蘭謝猿鶴飄飄步丹霄  
轉盼承恩渥雙旌擁皂蓋五馬纏金絡既從天台遊復

憩武夷樂碧水遶黃堂丹山耀朱褱  
蒼枝掛蒲鞭政閒聞嘯諾翻然憶故  
栖烟霞空寂寞矯首望宛陵飛聲寄  
寥廓

題陸太守所藏瞿塘日暮圖

墨妙狀空翠毫端聳崢嶸未窮崕  
嶠險但見烟雲生萬壑赴荆門奔  
濤天際傾中流灩澦峙輟轉盤渦鳴  
三峽蔽陰陽百牢壯關城金繩鎖地  
軸設險何時平萬古走舟車使人心  
不寧我聞十二峰中天開列屏高唐  
隔靈

女雲雨空冥冥恍惚白日暮哀猿嘯三聲林幽熊虎關  
路暗鬼神爭對此悵不樂愴然為之驚波瀾起枕石巖  
嶮生戶庭宋玉竟何為冥搜造化靈荒淫歸楚襄自騁  
文賦名予悲風騷人而多山水情孤吟發慷慨贈爾陸  
華亭

鄭二宣董七玘為別頗久暮秋之夜聯佩枉顧  
山齋分韻志別

孤雲與獨鶴千里悵悠悠時因長風吹雙落碧海頭鄭

侯念長違董子經時別幾望西南天孤吟嘯臺月昨日  
放扁舟輟棹三江流中夜造我語片言解離憂逸興橫  
素襟吐辭若流水揮杯對黃花兀然不知醉歡樂情未  
極復此成分飛矯首秋風外徒驚蕙草稀

題商山四皓

嬴氏暴黔首四賢離垢氛炎劉奮龍德了然耳不聞靜  
坐閱萬象前星沈紫雲周才不世見老死徒空文歛起  
趨明廷乃驚隆準君片言成羽翼轉盼收奇勲君子有

卷舒果哉安足云萬古六合間芝歌揚清芬商顏空仰  
止吾亦麋鹿羣

將歸龍門留別冶城諸遊好

海水與別意相看更誰深長風向東來吹我東歸心悵  
然舊山雲蒼茫遠洲樹一鴈飛晴空翩翩又東去此別  
非萬里後遊當幾時銜杯不盡歡握手翻成悲我去聽  
寒泉留君釣臺月唯有長相思因之寄天末

贈吹簫林生田時飲於雙澗

嶰谷製古竹林生調新聲風吹碧雲去鸞鶴皆飛鳴變  
徵忽飄洒淒然萬古情秦臺一片月此夕為誰明

題華峯望日圖

飛步青蓮花聳身凌紫霞天雞弄海色西掛三峯斜  
漱太陽精逍遙金母家長安日下影迴首望京華

同林一和龍門山中玩月效常建之作奉寄周  
處士玄林秀才敏

青山宴茅宇落日生遠陰蕭蕭霜氣寒暝色歸空林初



月未出嶺斜暉半西岑幽幽喧始寂杳杳緩復吟稍覺  
升飛鏡清微雲影沈忽而長天空遂使寒潭深萬籟度  
松枯餘聲響孤琴常以別鶴意期君千里心明晨拊越  
調因寄瑤華音

題千里掀篷圖效常建體

日沒川路濶松陰澄晚流掀篷卧天色超忽江潭秋渚  
月鏡中淨孤輝漾輕舟心將空際雲身與波上鷗了視  
無外物曠然神遠遊予亦滄浪情從君問芳洲

山泉賞

羣嶂橫秀氣飛流落雲中陰生寫古雪月壑垂長虹迴  
注石鏡淨秋臨遙天空孤賞憶謝眺青山度松風

題唐子華捕魚圖

楚江有遺叟夢澤多潛魚魚梁多水深擊汰晨登艫汲  
岸飯霜稻採洲蕪寒蘆晚嶼卷綸釣南望洞庭湖日落  
大川靜餘暉含空虛白鷗知我閒沿迴戀菰蒲漂揚隨  
風潮不復憂羅虞釣國本無意滄浪心澹如

首秋同羣公遊靈源寺

靈境不厭遠仙源在雲端入溪日已午猿鳥鳴聲寒釋  
子愛玄度停鐘啓幽關山門坐翠微石橋聽飛湍祇疑  
接衆真日與秋風還神遊無所事誓將去人間況我非  
作者懷芬異希顏幸因清羸意助爾禪心閒

九月八日郭南山亭宴集

分得下字

海國霜氣涼秋聲落遙野乾坤肅以清收納屬多暇出  
郭尋幽期同人命軒駕載酒入翠微憑高憩層榭蒼山

橫黃雲大江天同瀉飛雨霞際晴夕陽鴈邊下江山滿  
陳跡今古成代謝千載同一時黃花笑盈把酣歌林壑  
暝新月松蘿掛高興殊未平臨風獨悲咤

嶠嶼春潮

瀛洲見海色潮來如風雨初日照寒濤春聲在孤嶼飛  
帆落鏡中望入桃花去

衡江夕露

大江白露下秋氣橫滄浪夜色不映水微風忽吹裳孤

舟待明月時聞蘭杜香

松嶺樵歌

峻嶺饒朽木采之行且歌歌長白雲外遠與松聲和日  
落望烟歸山風吹薜蘿

同羣公餞鄭五秀才至鼓山寺分題贈別賦得

臨滄亭

劣嶺海上秀中峯開禪宮飛亭掛空翠直上臨方蓬溟  
漲在几席天光映簾櫳目極萬里外但見清濛濛曙色

從東來晃然靈境空登臨豈不偉別意嘆無窮

題空江秋笛圖送鄭助教入京

霜渚蘆葉乾鏡天極澄瀾美人弄橫吹思繞青雲端流  
微泛空濶引商激林巒五聲一時發江海生秋寒鷺鶴  
閒清越虬龍起深蟠了然滄海心坐見天地寬常以相  
思調期君千里歡曲終倚雲和離絃發哀彈

賦得客中送客

在山每送客客行思未已他鄉此別君離情滿天地長

空一飛鴈落日千里至故園未同歸寄君兩行淚

賦得春草碧色送丘少尹歸四明

春色有佳興送君惜別情  
帳前見芳草綠盡空江潯  
千里靄晴翠夕陽烟際深  
遙分白鷗水近映青楓林  
萋萋滿行衣萋萋生別心  
王孫行當歸靡蕪思越吟

賦得羅浮霜月懷鄭二逸人

海國梅始白飛霜動鳴鐘  
寒空一片月掛在羅浮峯  
夜色不映水清光與之同  
百里皆瑤華千里閉幽風  
蕭條

巖際葉嘹唳雲邊鴻遠客起遙念滄波思千重夢迴明  
鏡沒寂歷聞幽蛩

同羣公重遊竹林寺

分得朝字

初地出霞表幽尋不知遙重遊結巾佩值此落花朝雙  
樹得憩息諸天何沈寥攔間空翠落雲外天香飄法侶  
仍舊識相逢虎溪橋了然冥妄開悟彼禪誦饒機心政  
爾忘夕陽下山椒

郭晦之歸宸峯羣公相送至光巖寺

分得客字



欽定四庫全書

關中十子詩  
卷十

化城負東郭地古嚴公宅同佩結幽尋沉值將歸客山  
門坐翠微蘿逕入松栢定水駐行衣香雲繞離席銜杯  
雙樹間百里見海色日暮各分飛空山夜寥寂

將之京師夏日蒼林宴集作

有序

余昔與浮丘子鄭宣皆山樵王恭為沙堤之  
遊至則謁陳隱君子滄洲訪林思器于蒼林  
湖山烟水無日不放懷詩酒間無何浮丘子  
已高騫予亦被徵命將行思昔舊遊殆不可

復乃夏六月偕王自梅江復過沙堤館於滄  
洲堂決旬矣思器飲予離觴因覩浮丘子蒼  
林宴別之作諷詠不已酒酣因以離堂思琴  
瑟別路遶山川之句分詠誌別羣公詩成賡  
歌繼發樂飲無算一時去住情悰慷慨視浮  
丘不多讓也賦得離字并次斯語會者几十

人

昔與鄭浮丘來尋王子猷三人同二屐浪作大堤遊朝

欽定四庫全書

陳中十子詩  
卷十

十三

從滄洲吟暮醉蒼林酒陳翁忘年交林子金石友別來  
十度春鄭老登青雲同遊半白髮笑我復離羣離羣余  
所惜沙頭尋舊跡魚鳥却相疑故人不爭席縱酒如瀉  
泉涉湖多擊鮮長筵醉深夜傾倒平生言我醉君浩歌  
我歌君起舞中觴念王程別意渺何許出門分路歧驪  
歌空爾為丈夫四方志毋為嗟別離

題雲林書隱圖贈梅江許宗顯

愛爾江海居清風繼箕穎起予丘中賞逸興探靈境粉

墨含天光丹青狀雲影  
窻開象湖陰簾捲龍峰頂  
林靜絃誦閒波空棹歌冷  
滄浪可洗心白鷗待孤艇

舟發謝家埠江行有作

孤舟豫章水五宿謝家埠  
不見謝家人揚舲向西去  
中流夾雙櫓隨波疾如驚  
沿迴沙岸轉歷覽風景暮  
漁傍亂斜陽人家帶孤嶼  
登艫望青天茫茫但烟樹  
秣陵指雲端矯首頻北顧  
明發鄱湖西南風上天路

望廬山作

掛席度彭蠡停橈問匡廬蒼蒼五老峯秀出東南隅氣  
勢掩衡霍崢嶸壓東吳千巖散秋色倒影澄江湖倏忽  
霽飛雨瀑流掛香爐崖懸殘雪古澗落垂虹孤聳目萬  
仞表茫茫飛鳥無飄然挹空翠心與浮雲俱我欲呼謫  
仙結巢松已枯遲回徒仰止飛鷁上天衢

題牧牛圖

金壇張公將出宰新寧持牧牛圖來求題用  
是知公有牧人之術矣遂倣唐儲光義家法

賦牧童詞以贈之

大澤饒綠草古陂湛清泉  
泉清濯我足草綠護我眠  
我牛既擾馴麾之不庸鞭  
並岸多魚蝦涉流可羅筌  
機忘信所適得喪常晏然  
獨樹帶殘日遙村生暝烟  
寒臯隨我飛橫吹導我前  
白石無悲歌青山多甫田  
契茲理人術庶以全其天

題舊畫山水為陳果之侍講賦

愛爾木石居起予山水音  
援毫不自惜逸興生遙岑  
絕

巖倚空翠浮雲生遠陰未窮林路入但見烟蘿深昔與  
山中人俱懷塵外心及茲謝猿鶴共解蘭薜襟玉堂播  
秋香一枝標桂林而我隨末光去辭丘中琴相期反初  
服同賦歸來吟

題邑生陳溢鍾山草堂

鍾生抱藍田水木含清氣愛爾靜者居草堂在山翠簾  
櫳映竹開几席侵花置野客載酒過山僧抱琴至陶然  
接歡賞邈爾成幽契月出天海空雲生石門閉岱溪樵

唱來沙頭松聲細佳趣足淹留遠心更迢遞維時屬休  
明巖穴無遺棄終南登捷徑北山裂荷製余亦問山靈  
斯人果忘世

遠嶼堆藍

江晚波自濶天空諧遠尋渚霞霽孤島綠映滄浪深殘  
日鏡中沒餘暉在前林黛雲結玄髮碧氣橫素襟其以  
卷畫山寄君無聲吟

秋江漁唱



大川饒數咎淺瀆無吞舟日暮收我綸唱歌度中流歌  
長入空濶兩岸江聲秋斷續和鳴榔搖颺隨狎鷗曲終  
人不見雲水空悠悠

螺渚春烟

幽渚暖波綠長烟迷晚春橫林引空素幕水卷羅裙靈  
女化已久謝生無復聞空餘一抹黛朝暮逐行雲

野渡橫舟

落帆逗前浦渡口喧已寂野艇橫淺流空江帶愁色漁

歸絕島遙鳥度羣山夕應有待潮人吟成山月白

牛路春耕

淺渚蒲葉長深村杏花吐東臯春事興盡室相隨去谷  
鳥勸我歌青山澹吾慮日暮望柴關牛涔取歸路

龜湖晚釣

湖上夕水寒潛鱗避深釣野老本無營一竿掛殘照人  
知白首心吾愛滄浪調何必客星高將貽故人笑

漳溪曉渡

山中人尚眠渡口猶寂寂絕岸倚孤篷平沙沒行跡雲  
收山翠高日出溪流白一曲勞者歌溪山帶離色


送四彥歸閩州詩并序

永樂六年冬十二月大典書成擇日表進與  
纂修者三十人咸蒙賞賚而恩榮遣歸者三  
之二吾閩儒士鄭銘陳第泮生陳循林彬皆  
在遣中戒行有日凡鄉友之在禁林者聞而  
出錢且惜其去而四人者掉頭拂衣懽欣笑

忤無落落不得志色然後知其含英閎彩將  
益畜其中以肆於外豈徒輕試於藝者哉乃  
相與酌酒言別發為歌詠以壯其行典籍王  
公安中首歌五闕修撰王公中美春坊贊善  
陳公仲完相繼倚和余時繭足離羣愧不能  
追逐於臨歧之際因感激吐辭歌古調三疊  
重賦四君咏凡七章厠羣公之末以寫余故  
園之思以勗其進修之大

鴈月秦淮水都門正飛雪離人踏雪歌驪駒待明發天  
寒行旅稀念子今時別四馬何翩翩搖鞭指閩粵閩粵  
路漫漫仙霞尋故關家林物候早到日換春寒采服如  
畫繡登堂奉清懼嗟余念遠道悵望空雲山青山憶舊  
遊白髮悲明鏡斗酒送君行留懼不成興淒涼木天吟  
寂寞文園病何以贈臨歧重歌四君詠廣文多士賢英  
英閩中彥手持柿葉書三獻蓬萊殿衆望期頴脫君胡  
韜末見却憶龜山雲離心逐飛霞陳子太古心袖中龍

唇琴玉堂拂瑤軫三奏無知音舉世趨下里長歌歸泮  
林子期尚可鑄君無徇哇淫泮水長林彥秋風逸氣高  
孤飛戾霄漢兩袖懷霜毫恥角雕龍技歸藏文豹毛青  
雲路如砥遲子重遊遨爾家百尺樓鬱勃湖海氣一鶚  
薦遙空飛鳴走羣鷺天池濯寒流玉堂迫清思何以憶  
幽棲太常結深翠



閩中十子詩卷十

欽定四庫全書

集部

閩中十子詩卷十一至五

詳校官中書<sub>臣</sub>瞿 煦

助教<sub>臣</sub>常循覆勘

總校官進士<sub>臣</sub>朱 銓

校對官中書<sub>臣</sub>吳紹昱

謄錄監生<sub>臣</sub>邱卿雲



欽定四庫全書

閩中十子詩卷十一

明 袁表

馬燮 編

高待詔集二

七言古詩

瑞應甘露詩并序

永樂十年冬十月甲子皇上將舉大狩之典

乃命皇太孫殿下率諸軍演武於方山之陽

是日天降甘露於茲山既採取以獻越五日  
戊辰天子親御六飛由朝陽而東大獵於陽  
山天復降甘露視方山有加上命採取以示  
羣臣又十日丁丑再獵於武岡甘露降如前  
戊寅朝於奉天門山西繁峙縣復進嘉禾休  
徵符集臣庶稱賀翰林待詔臣高廷禮稽首  
頓首恭惟皇上嗣統以來海內人安萬方賓  
服至德至功格於四表太和之氣蒸於六合

發見諸祥前後以百十計是行式遵典禮觀  
兵以講武事獲禽以虔祭祀故天祥隨處以  
應地瑞符日而進蓋由皇上與天地合德所  
致也臣忝職詞垣獲際文明之運覩茲盛事  
謹拜手稽首賦詩以獻詩曰

聖皇至德超八荒太和綢繆天畀祥五風十雨樂耕桑  
靈飛瑞走來梯航時平講武弓矢張冬隙大狩虔蒸嘗  
神孫受詔先啓行南出大獵方山陽萬乘繼發循東方

先於陽山後武岡三軍熊虎多材良千里蹄翼無匿藏  
岳靈告功徹上蒼下降甘露何穰穰千林萬木森松篁  
浥浥泥泥凝精光流珠綴粉懸琳琅採枝掇葉含芬芳  
歸來天子坐明堂三三九戶羅神漿清如冰壺涵雪霜  
湛如玉瓚泛流黃滑如凝脂白截肪并如醍醐冽且香  
東方小兒琉璃觴華山童子五綵囊星輝獻采來鏘鏘  
側聞海外異人千里長胸吞美酒五斗量又聞金莖高  
挿空中央雲表沆瀣分清涼紀課傳說誠荒唐茲非天

公輔聖皇此物何以升巖廊西土佳禾亦致將一莖五穗垂金穰禎駢瑞集符運康薦諸太廟昭先王示彼臣民協萬邦百辟稱賀聲洋洋卿雲興歌舜德彰靈芝涵泳漢祚昌小臣再拜獻頌章陛下萬歲垂衣裳

擬老將行

十三身屬執金吾二十專征破骨都一生力盡三河外萬死身輕百戰餘敵兵長驅度絕幕漢騎憑陵皆奮躍勇決寧懷巾幘羞擒生每作轅門縛六十年來白髮新

玉關長望苦悲辛老去廉頗思用趙憂來王翦尚要秦  
一朝謝病衡門下萬事蹉跎成解瓦麾下偏裨屬鎮軍  
里中俠少輕司馬落葉空庭鳥雀閒蒼苔窮巷車輪寡  
春山抱甕向青門秋水行歌歸綠野昨夜魂飛到隴頭  
壯心未已淚雙流寶劍匣中光炯炯驂騑上鳴啾啾  
近聞天子掃狼烟闕下論功皆少年白首將軍新破敵  
黑頭僕射再臨邊始笑子卿歸屬國節旄落盡海西邊

邯鄲少年行

燕趙多奇士邯鄲俠少年平生負膽氣勇決如流泉黃  
金如山不足惜百萬呼盧常一擲家藏死士不記名身  
遇恩讐便輕敵邯鄲陌上盛繁華關雞走馬相矜誇忽  
報烟塵在東北回鞭却向平原家相看一言不合意歸  
來縱醉邯鄲市市人笑我同衆人擊劍悲歌向誰是天  
生俊意自飛揚不遇知音徒慨慷君不見幽并壯士死  
千載猶聞俠骨香

浮亭月下聞李大秦箏歌

孤館夜寂寞秦聲轉淒然醉來聞向明月下客心搖落  
秋風前飄飄十指聲猶訴颯颯長林驟飛雨激若荆卿  
易水歌悲如蘇子河梁語角羽初停又拂商四郊黃葉  
紛飛揚劍門滴盡邊人淚鏡閣啼殘少婦腸西江曾臨  
吹玉笛馬上淒涼聽不得祇今彈得心欲狂四座相看  
失顏色伶倫去後空有思世上秦聲誰得知偏同客裏  
歌楊柳長伴軍中舞鴈兒轆轤金井梧桐冷壯士衣寒  
心耿耿一杯何處酌平原酒盡浮亭不堪醒



終南疊翠歌贈趙孟寬少府

我本學仙者名山愛遊遨登高少東魯泰岱如秋毫南  
遊北走不稱意西攀始得終南高終南崢嶸何壯哉勢  
拔五岳橫三台層巒沓嶂紛霧集縈青疊翠如屏迴矯  
首睨絕頂聳身獼猴臺憑虛一長嘯萬里陰風來雙峯  
却立高欲摧石門厓口皆曠靈颯然雲散四天淨千巖  
萬壑青如苔皎如映日戈矛開煜煜丹霞雲錦堆飄如  
羣仙羽蓋下瑤水儼如千官劍佩趨蓬萊龍飛鳳舞各

奮躍崖張壁立爭崔嵬翫景不厭遠探奇未能回松杉  
嘈嘈度空籟兩耳似聽絲絃哀逍遙東吞黑谷日昆明  
北浸陰地灰西南太白最高處黃鶴玄猿愁欲度寒飈  
六月吹雪花紫氣三時結玄霧下視羣峰失翠微中窺  
萬嶺迷行路我欲攀雲造天語厯井捫參未言苦晶明  
照耀或可親倏忽晦暝不知所瀑泉殷殷秦地雷落葉  
蕭蕭漢陵雨昔時此地如登仙榮光體氣何赫然九重  
宮闕碧霄上夾道軒車白日邊富貴榮華知幾許千金

快意如浮烟邇來秦漢幾千載空餘渭水流東海妙舞  
清歌不復聞金輿玉座今安在但見千林蒼蒼杳靄間  
秋風去兮春日還白雲長入畢原樹明月虛照藍田關  
又聞猿聲啾啾滿林谷啼烟嘯雨愁空山山中之人野  
服黃冠掃石朗咏揮絲妙彈春風時來落花晝閒了然  
高卧紫岑裏綠羅裊裊不可攀固守麋鹿志本無軒冕  
情因來窺捷逕笑學盧生行倏起把芙蓉飄飄朝玉京  
我時拂衣蹈東溟君亦驚飛到蓬瀛風期汗漫三山上

向余每說終南青憶為終南行興因終南發醉揮墨客  
紫霜毫為君掃却長松雪眼前空翠如可捫何必山中  
弄雲月

醉歌行鄭二廣文西齋宴集

分得一字

吾愛鄭夫子妙年振英聲讀書不肯死章句笑殺當時  
魯兩生男兒何事空饑餓角巾嘯起東山卧三奏陽春  
和者稀立談古人獨知我知我家無二頃田幾番相見  
客中憐開心寫意不足惜千金散盡還依然廣文高館

歸來好搗鼓談經日應早堂下諸生揖鄭虔門前食客  
謁平原傾家祿米三百斗一歲只供沽酒錢西齋為余  
造瑤席滿堂盡是青雲客綺席金盤蘇合香銀瓶綠酒  
玻璃色昨夜東風天際來桃花笑人歷亂開春光如此  
得幾日毋多酌我何為哉山公不解倒騎馬習池春水  
空莓苔我歌白雲興偏逸君起揮毫誇第一空名何用  
掛百年劇飲惟須醉千日鄭夫子聽我歌與君更進酒  
但使朱顏酡君不見陌頭楊柳色青青飛花昨日吹滿

城又不見樂遊原上咸陽道漢闕秦陵幾迴好昔時歌  
吹激浮雲今日殘陽映衰草不用悲歌空斷腸請君勸  
客勿停觴古來惟有留賓驛到處逢人說鄭莊

題無為天師畫閩山勝覽圖為延平王將軍賦  
閩山設險雄兩關九峯直下連三韓真人落筆走山海  
浮天縮地須臾間窮崖絕壁不可攀飛青疊翠來相攢  
聳身欲上萬仞表砥疑坐我浮雲端壯哉形勝矜吳楚  
開國英雄幾威武劍城高拱控雙溪鐔水東流送千古

君不見鑕水東流去不還鑕上至今風雨寒深沈洞府  
了莫測那知不有蛟龍蟠好文將軍不好武白晳專城  
偃貔貅城頭鼓角靜朝昏城裏絃歌儼鄒魯幕府秋閒  
爽氣來金鞍駿馬重遊陪登高極目見萬里壯心直與  
雲俱開一時幕下皆鄒枚摘文振藻何奇哉開圖醜酒  
賦嘉頌遙祝堯天萬歲丕我愛名山將白首五岳尋真  
不辭走偶聞高義逸興飛披拂白雲笑揮手手揮白雲  
袖兩毫金天汗漫接盧敖相期更訪蓬萊頂百尺長竿

欽定四庫全書

卷十一

釣巨鰲

題景昭畫長江萬里圖為鐔郡生季鐔賦

潯陽九道流雪波三湘漢沔通岷池邊鸞丹青狀雲水  
寫空走浪回江河江頭東風昨夜過綠綺粼粼春色多  
汀花遠近向人笑水鳥下上鳴相和鴛鴦鸕鷀明沙渚  
四喜雙喁亂紅樹漂揚鳬鴈鏡中浮浩蕩白鷗雲外去  
昔遊桂棹楚天深三月風光春滿林載妓傾杯醉魚鳥  
桃花兩岸蕩人心別去繁華三十載夢憶湘潭隔滄海



九峯溪上粉圖開一片江南春色在  
李生妙年肌骨清  
古心愛畫如瑤瓊胸吞雲夢萬餘里  
欲寫層瀾登玉京  
玉京峨峨五雲裏天塹洪濤限揚子  
芳草萋萋白鷺洲  
垂楊裊裊秦淮水  
思波照耀錦為衣  
拂拭畫圖天上歸  
我亦買船待江口  
與君爛漫娛春暉

何滄洲

伯度

寫月中影扇面為曾維直賦

魯時

應薦京師

鏡裏桂秋影滿堂明月寒不聞風雨聲  
但見蛟龍蟠滄

洲之人何伯度亂葉縱橫走毫素瀟湘洞庭當几筵玉  
管瑤笙起窻戶昔年飛夢楚江潯蒼梧日出生遙陰九  
山高縣片月白萬緣倒浸寒波深英皇不來夜沈沈淒  
涼誰奏雲和音空林落葉響秋露啼猿嘯鬼愁人心魂  
搖魄動倏驚起長憶夢遊千萬里南豐夫子開新圖飄  
然如入簞簞裏君披琅玕朝玉京余亦拂釣歸滄溟臨  
歧愧乏繞朝策高歌贈爾雙瑤瓊功名事業照汗素風  
期汗漫來相迎一枝折待連鰲手持向蓬萊頂上行

題畫山水

楚水日夜綠楚山多在秋賞心掛遙翠逸興生遠游長  
松虛構臨空濶松影波光映窻闥一葉扁舟天際來疑  
是山陰雪中發了然相對澹忘機短策尋橋行且遲洞  
庭水落鴈聲遠夢澤天寒霜氣微憶曾飛夢三湘渚桂  
棹浮空不知所酒酣吟上岳陽樓錦袍仙人和予舞西  
風吹冷紅塵衣紅塵著人思夢歸何處江山如畫裏期君  
爛漫弄晴暉

送鄭克萬還睢陽軍

海國尚殘暑梁山寒露多一帆掛秋色北上臨大河  
河山設險睢陽戍張許昔時守兵處至今忠義在人心壯  
士聞風毛髮豎夫子驍雄仍好文少年投筆要奇勲倚  
戈汴水看明月立馬夷門望白雲時平大道無難阻遊  
子歸來念鄉土羽檄還同毛檄歡鐵衣也學萊衣舞家  
林暫駐復言辭拂劍西風傷別離萬里送君歸幕府幾  
時寄我從軍詩

贈友漁樵歌

我本漁樵者結交青雲人朱門華館不下士青山白屋  
歸來貧聞君愛與漁樵友每逐漁樵在林藪兩屐松風  
萬壑間孤舟蘿月雙溪口朝與漁者親暮與樵者隣山  
厨束薪煮白石豎飯折荷包紫鱗春風行歌出林鳥落  
日扣舷渡江渚負策閒隨黃鳥吟濯纓時對騷人語世  
人結交徒結名黃金不多交不成羨君不交黃金貴却  
友漁樵如弟兄白頭與我初傾蓋開口論心向十載渭

水稽山人已非鮑生仲父名空在往事蒼茫不可尋越  
城斗酒惜離心醉向滄浪歌伐木更從何處覓知音

古咸陽行

長安古城盡禾黍故國荒涼變今古秦帝山河滿夕陽  
漢家宮闕隨塵土咸陽昔時何壯哉離宮複道飛空迴  
五陵白日歌鐘起三輔紅塵車騎來一朝坐見繁華歇  
冠蓋散為烟霧滅草木猶纏戰血腥丘墟尚帶行輪轍  
年代悠悠經幾秋空餘渭水向東流回中古道無遊輦

關內何門尋故侯傷心此地不能道惆悵雄圖成蔓草  
惟有終南萬仞青年年看盡行人老

奉酬陳二先輩歲晏憶別首春見寄之作

歲暮雨霰集海雲暗長空滄洲寒盡飛白雪春風吹落  
龍門東龍門江上滄浪子忽聽陽春滿流水君不見千  
里滄浪歸海深看君文章亦如此知己如君不易知與  
君相逢須醉歸別去還為殘歲隔詩來却有滄洲期人  
生萬事良悠悠百年莫為離別愁今日相酬郢中唱他

時還放剡中舟

賦得吳航渡送趙少府之京

君不見吳航渡河上蕭蕭多古樹樹根積石長青苔應  
比昔人繫舟處寂寞寒潮自往還關河北望空雲山天  
浮百粵榮光歇海接三吳霸氣寒吳王城闕幾千載舸  
艦何年到閩海危檣峻櫓逐飄風今日吳航名尚在江  
上年年春草新城頭車馬往來頻野鳥不知驚候吏垂  
楊空自送行人郎官匹馬趨京口吳航渡口飲若酒輕



舟應過闔閭城為問樓船今在否

賦得龍門渡送林八之京

龍門渡流水行人日來去行人怨別嘆西東流水無心  
自朝莫君不見江水東流到海深若比離情更深處居  
人誰奈住龍門朝朝觀別易傷魂夕陽忍見瀛洲草莫  
雨愁聽西峽猿逢君躍馬趨京闕渡口柳枝為君折昔  
時相見不盡歡此日相看空惜別雲山漠漠興悠悠正  
是龍門落葉秋河上竹枝歌莫發知君故里惜移舟

賦得落木寒泉送陳京進士之京

谷口飛雨散微霜  
天地寒寒泉與落木  
一夜滿空山  
山前驪駒歌未已  
落木寒泉一夜起  
萬壑長風吹出來  
愁聲併入行人耳  
一路行人聽不窮  
閩山浙水秣陵東  
飛流琤琮雜空籟  
亂葉颯沓兼寒蛩  
長松高月古溪映  
靈境真機更清淨  
野客琴中趣轉深  
孤僧定裏心偏靜  
六屏山下憶幽尋  
褰裳一步一清心  
白雲對酒看懸瀑  
落日披書坐遠林  
於今桂枝在君手  
笑我支離去時久  
沉

是臨歧落葉分相思不奈怨離羣山中泉水轉蕭索  
夜寒聲誰共聞

賦得籌谷飛雲留別滄洲陳隱君

籌峯崢嶸紫翠分千厓萬壑皆白雲宛如朝莫陽臺下  
巫山氣色含氤氲有時出岫連烟渚幕樹遮泉不知所  
渡海長隨萬里風浮空忽作千山雨蘿逕松門落照寒  
孤猿獨鶴共知還巖頭仙客應閒卧溪上幽人時坐看  
滄浪別墅依猿鳥遊子春來看山好回首龍門盡白雲

念此使人歸欲早別路峯前花正飛何年共結白雲期  
幾回吟向春天樹惆悵江東日暮時

題臺江別意錢顧存信歸番禺

置酒臺江上悵然傷解攜番禺天萬里矯首南雲低停  
舟對君日將暮目送南雲指歸路鄉夢多隨蜃母樓家  
林近入扶桑樹滄浪浩蕩杳難期此別重逢又幾時東  
去臺江應到海惟因流水寄相思

梅江謠留別梅江諸友

六月登玉京炎蒸欺人不可行側聞梅江水寒冰玉壺  
只如此梅江之水千丈深人言此水直千金千金未必  
稱人意我欲愛之清煩襟皆山樵人坐我語相攜尋幽  
指何許塵心飛度象湖雲水濶天長未言苦青眼故人  
如白鷗招邀待我黃沙頭采秀探奇入靈境上攀龍峰  
最高頂龍峰絕頂窺蓬瀛登高望遠形神清大江茫茫  
寫溟漲元氣浩浩無虛盈飛濤一髮雪花白遙山數點  
琉球青欹帆側施凌空濶歷亂中流棹歌發居人雲水

弄生涯撒網拋綸到窮髮君不見龍峰山陽五百家龍  
峰市上半魚蝦儒生不學老農稼青門多種故侯瓜三  
尺兒童誦詩禮向余亦指長風沙一嚴兵備限荒服百  
雉孤城鎮海涯孤城殘戍揚威武島夷蠻苗竄如鼠清  
秋幕府偃旌旗白日轅門卧貔虎如此承平百事無江  
山所以待吾徒賢豪傾倒平生意瑤杯綺席來相娛我  
愛江山對君酌江山笑我辭損鶴從來心事戀烟霞漸  
老誰知愧林壑今日向君傾綠尊千觴不斷別離魂臨

岐揮手謝知己飛心騁目瞻天門興為梅江謠醉別梅  
江去他年此地濯塵纓意得西城別君處

送鄉人王仲詢之永嘉司訓

楊花飛盡春三月離人思繞楊花雪一車行李發京華  
千里鄉心指閩越念我辭家一度春春殘愁別故鄉人  
銜杯祖道惜分手羨子儒冠早致身此行不用傷離索  
一路雲山引鳴鐸茂苑花邊匹馬遲錢塘月下孤舟泊  
五月揚帆入四明永嘉百里候文星白面書生向人詢

黑頭博士解談經

題畫山水贈別陳希道

青山置眼前秀色可攬結白雲忽飛來相看共怡悅  
疑坐我匡廬間五老芙蓉牛明滅嘉樹重林生晝陰清  
溪流水清我心野橋蘿逕孤筇晚古屋茅簷落照深山  
中之人希夷子妙年習隱雲山裏祇愛青山不厭貧高  
卧白雲未應起知我無聲詩趣閒起來長揖指雲山舍  
毫繹思遇知己攢青疊翠須臾間我欲辭山拂衣去君



還索我相思句留却相思一片心掛向圖中最高樹情  
亦不可盡言亦徒爾為惟應看畫長相憶笑指雲山遲  
後期

遊靈峰寺和王皆山舊遊之作

丁亥六月五日大暑余時將釋服歸朝別藍  
田諸舊好陳氏伯仲領余來遊此山因覩故  
人王恭舊遊之作慨想當時之幽致雅集不  
減山陰而不知一觴一咏罰酒者幾人矣今

余後來衣冠載歌陽春能無繼乎詩成并贊

斯語以記歲月

紫雲炎氣橫紫清客行愁作升天行側聞龍龕有絕境  
清涼可以清心情招邀結佩賢豪客採秀探奇入靈宅  
徑轉香雲靜影空溪回定水驚湍寂登高壯觀大海東  
扶桑樹色搖空濛蓬萊一勺幾清淺萬劫此地開禪宮  
翫景興轉逸騰身凌紫烟上攀香爐最高頂下聞水樂  
鳴三天三天諸品同清淨兀坐安禪了真性蛟龍破壁

動心魂應是故人昔題咏故人如今在玉堂雄詞逸翰  
生輝光舊遊幾處空陳迹別夢三時繞故鄉而我辭山  
笑遲暮暫息塵機得玄度支公不遇且銜杯大醉題詩  
下山去

題米元暉畫山水卷

米家墨妙稱擅場關李俗狀安可方虎兒雄筆力扛鼎  
早有才名繼阿章白雲鴻洞無根樹光溢重瞳接恩遇  
尺縑不肯與閒人世上流傳少真趣此圖恍惚海岳菴

得非家學青於藍摩挲不暇別疑似但見雪山一片如  
江南遙岑疊巘含殘雨羣壑重林不知所水接方蓬海  
上吳樹浮雲夢天連楚却憶匡廬倚桂舟祇今疑是畫  
中遊白頭謬隱金門日清夢長懸碧嶂秋承平公子餘  
紈綺脫略高情愛山水重購冥搜喜得之良金美玉徒  
為耳襄陽橋梓幾風烟寶晉真源誰復傳嗟予好古笑  
流俗幾度含毫愧昔賢

賦得朱雀橋送周惟翰典籍扈從北巡

金陵二月春雪消南出都門天路遙玉虹垂空飲絕岸  
朱雀何年橫作橋橋邊芳草迷春望橋上風光春駘蕩  
流水遙連白鷺洲行人共指烏衣巷千古行人行不休  
六朝流水至今流中華日月扶神器萬國車書聚帝州  
承平海宇歡寧謐萬乘時巡從此出白下門前轉翠華  
長干道上傳清蹕玉堂詞客載圖書扈從萬乘駟馬車  
行到橋頭應駐轂市人爭看馬相如

賦得三山曉霞送黎慎之歸清江

秣陵諸峯蒼翠重青山削立三芙蓉朝朝丹霞掛絕頂  
暄暄紫氣如蟠龍扶桑弄影浮窮髮捧出晴陽照天闕  
瑞彩遙連鍾阜雲祥光倒映金川月暮洞蒸林瑣翠微  
江山到處含清暉赤城長帶千巖色楚澤曾隨孤鷺飛  
有時橫空散紋綺白鷺洲前映秋水畫史雙毫點染間  
行人匹馬沈吟裏清江才子遠朝天逸興臨歧對患連  
目送三山霞外路玉堂邀我送行篇我憶三山隔閩海  
蜃氣尋常吐光怪別來霄漢歲月深夢去烟霞泉石在

復此三山送子行殘霞片片帶離情好將霞彩裁為錦  
歸去人看衣畫榮

紫微峯歌送劉大之京

六平西倚大海邊橋柯東與三神連迴厓沓嶂去不息  
攢青飛翠來眼前紫微秀出霄漢中孤峰巧削金芙蓉  
幽厓朝光積陰雨暗谷夜氣生長虹傍有翠微高下立  
雙開文筆出晴空四時仙風長瑤草六月古雪鳴寒松  
片雲當遮白石澗萬籟吹度珠林鍾登高壯觀大海東

扶桑樹色明方蓬  
洪濤萬里浩無極  
奔溪百折來相通  
紫微之山人深居  
紫微裏閒看山色  
清我心高卧白雲  
扶不起昨日凌風  
頂上行千林樹色  
帶離情遙見山陽  
開祖道交觴共餞  
劉公榮眷此斗酒  
別惆悵金陵道人  
言帝鄉樂勝似長  
安好出門西笑江  
路分三山回望紫  
微雲高歌一曲各  
分手惟有青山長  
送君

閩中十子詩卷十一



欽定四庫全書

閩中十子詩卷十二

明 袁表

馬燧 編

高待詔集三

五言律詩

寄陳五先輩

春山曾共賞一別又西風岐路非關遠  
心期恨不同暮天孤嶂靜秋水夕陽空  
為有相思寄雲邊送斷鴻

晚春寄懷林八員外董七侍讀

先有遊董  
巖之期

黃鳥堪求侶，青山獨掩扉。  
相思空夜月，一別換春衣。  
江樹雲邊出，林花雨外稀。  
董巖佳賞地，連佩莫相違。

題仙山樓觀圖

神仙不可接，真境亦應求。  
我有烟霞想，心飛泰華秋。  
花源通碧洞，松路入丹丘。  
彷彿雲中望，參差十二樓。

夜泊官塘見新月

落日長川暝，孤舟獨客愁。  
若為今夜月，不是故園秋。  
片

影懸珠斗微光下玉鉤  
心期明鏡滿指日大刀頭

送許志學北遊

聞說幽并北巖冬雪作花  
長空無過鴈念子獨辭家  
朔月迎仙權灤雲引客車  
薊門登覽處顒望憶京華

題可貞王紀善獨秀山房

別構倚雲開孤峯秀色來  
飛泉侵畫幌空翠落瑤杯  
名比三珠樹詞傾五吏才  
沉陪銅輦暇賦咏有鄒枚

除夕

臘盡雪初晴春迴促漏聲孤燈親遠客一歲只殘更律  
候青陽轉年隨白髮生迎新應待旦端珮謁承明

重送許子之巴西

雙鳬新被命萬里遠從官聞說巴西好何愁蜀道難峽  
猿驚印綬蠻吏識衣冠聖德懷荒服賢勞莫憚煩

題四皓圖

連生無不可世外復人間雲卷逃秦去風期翼漢還功  
名留碧簡圖畫見蒼顏千載商山下松泉自掩關



閩中十子詩卷十二

欽定四庫全書

閩中十子詩卷十三

明 袁表

馬熒 編

高待詔集四

七言律詩

擬岑補闕參奉和早朝大明宮之作

明光漏盡曉寒催  
長樂疎鐘度鳳臺  
月隱禁城雙闕迥  
雲迎仙仗九重開  
旌旗半掩天河落  
闔闔平分曙色來

朝罷珮聲花外轉回看佳氣滿蓬萊

擬高常侍

適

送王李二少府貶衡巫

曉鐘寥亮鴈聲哀候館鳴雞曙色催  
兩地送君雙別淚西風駐馬共銜杯  
巴山落月啼猿斷楚水孤帆片雨來  
莫怨異鄉成久隔漢庭還憶賈生才

九日同鄭二逸人董七侍讀林一秀才雨中宴

集朱聘君碧潭軒以微雨潭上來分賦

得微字

微霜昨夜塞鴻飛雨裏逢君未授衣  
華館把杯仙菊潤



青山對面故人稀  
泉飛百道溪聲遠  
風度重林酒氣微  
明日相逢乘霽景  
登臨不用怨斜暉

送林膳部歸治城

龍門雨裏識君時  
醉度殘春又別離  
芳草滿衣愁對酒  
青山倚棹共題詩  
晴川樹外孤城出  
野館花邊匹馬遲  
歸去釣龍臺上月  
好憑南鴈寄相思

送秀上人遠遊

一鎰初別祖師禪  
孤月寒雲思渺然  
飛錫却從紅日外

浮杯還度白鷗前  
尋鐘野寺經殘雪  
乞食春城向暮天  
我有采真秋興逸  
相期何處聽寒泉

寄林七膳部兼呈林懷之廣文

無諸臺下葉初黃  
客裏相逢值早霜  
秋館醉看仙菊滿  
禪房坐識雨花香  
別來塞鴈江雲隔  
夢去青山海路長  
白髮廣文憑問訊  
門生還有幾升堂

酬林一和閒齋見懷之作

東山送夜鴈歸聲  
兩地相思舊感生  
芳草白雲無那別

春風黃鳥若為情  
雙溪日下鷗波靜  
獨樹原頭獵火明  
誰道離居成寂寞  
好文地主久知名

得鄭二宣海南手札

番禺天外古交州  
念子南行戀舊遊  
故國又經花落後  
遠書翻寄鴈來秋  
梅邊野飯逢人少  
海上青山對客愁  
為報羅浮雲影道  
早隨明月引歸舟

奉和王檢討偈元日早朝

嚴城初啓漏聲殘  
閭闔平分曙色闌  
一葉仙裳迎淑氣

九重宮樹却春寒  
天近蓬萊瞻日月  
風回環佩綴鴛鴦  
共膺舜歷三陽泰  
長奉堯尊萬歲歡

奉和梁典籍用行春日禁中對雪之作

青春瑞雪滿瀛洲  
紫禁恩光湛欲流  
飛絮亂隨仙仗舞  
凝華高映衮衣浮  
宮中一夕皆瑤樹  
天上何年盡玉樓  
況有詞臣能賦咏  
陽春此曲更難酬

送釋玉林領僧綱歸建州

春風飛錫上瑤京  
塵境真機去住情  
雙樹別來金刹遠

中峰歸去紫衣榮  
新承一命沾殊渥  
還領羣僧生化城  
我欲舊山尋社侶  
溪頭應見遠公迎

送雪峰僧龍淵歸三山

新持半偈出青蓮  
孤鶴閒雲思渺然  
金錫來承天漢語  
紫衣歸坐雪峰禪  
尋鐘野寺殘山外  
漱齒寒流落照邊  
行至東林休結社  
松枝已偃舊房前

送政上人遊京師

符山講罷別人天  
獨鶴遊雲思渺然  
飛錫欲凌霄漢上

浮杯還度海鷗前  
白門花落香時夢  
紫禁鐘殘靜夜禪  
解紱自期歸去晚  
相從何處聽寒泉

賦得揚子江送別林崇信文學之溫陵

天塹何年擘巨鰲  
地分南北限波濤  
雲浮絕島金山出  
潮撼孤城鐵甕高  
往事幾迴人世換  
東流千里客行勞  
龍河落日空洲樹  
送子離心正鬱陶

送陳伯偉姪健歸三山

驪歌拂曙送殘鐘  
白下離尊醉仲容  
別路還尋楓嶺去

何時復向竹林逢  
舟迎雙劍潭前月  
門對三山石上松  
到日定應懷老阮  
家書欲寄意千重

秋夜枉鄭二隱君溪上人過訪

故人別後嘆淒其  
遙夜空山慰所思  
黃菊喜逢高士醉  
白雲似與野僧期  
明河一鴈飛霜早  
落日孤城下漏遲  
談笑只愁天易曙  
行雲流水又分離

欽定四庫全書

閩中十子詩  
卷十三

五

閩中十子詩卷十三



欽定四庫全書

閩中十子詩卷十四

明 袁表

馬熒 編

高待詔集五

七言絕句

春暮寄林一和

雨裏春衣惜解攜  
出門愁見草萋萋  
憶君只在星溪月  
無那青山杜宇啼

欽定四庫全書

卷十四

溪上別馮一嶼

出門紅葉滿清溪  
君向東湖我向西  
今夜青山明月在  
相思兩地聽猿啼

江亭別

春江湛湛白鷗波  
一曲陽關為爾歌  
莫向尊前惜沈醉  
青山長在別離多

早鴈

涼霜八月塞天寒  
飛度衡陽楚水寬  
少婦樓頭初掩瑟

一行先向夕陽看

林真士畫

楚雲天外數峰青  
春水桃花滿洞庭  
落日樓臺明鏡裏  
欲停瑤瑟候湘靈

江上扁舟圖為林維德賦

扁舟一葉楚天寒  
遠樹空江野照殘  
憶得湘潭歸棹晚  
千峰倒影鏡中看

題界畫臺閣

帝子鳴鑾去不還  
朱簾空捲對西山  
詞華零落三珠樹  
秋水長天祇自閒

其二

銅雀高樓借日懸  
姑蘇舞榭入雲烟  
繁華一落金屏影  
半是吳山鄴水邊

題天山罷獵圖

雪淨沙場獵騎歸  
解鞍相對語寒暄  
左賢又獵天山道  
正是天山雪片飛

題瘦馬

一自天閑謝六飛  
霜毛蕭颯力行微  
圉官獨立休惆悵  
明歲秋風首管肥

題夏景

空翠凝雲濕未乾  
草堂相對正臨湍  
溪頭昨夜添新雨  
百道泉聲作夏寒

題秋景

疎林遠岫帶烟霏  
積水長天合翠微  
何處寒聲隨落葉

一行新鴈向南飛

題赤壁圖

赤壁江山幾度秋  
畫圖猶見舊時遊  
祇今惟有東山月  
夜夜清光照客舟

閩中十子詩卷十四

欽定四庫全書

閩中十子詩卷十五

明 袁表

馬熒 編

王典籍集一

五言古詩

舟經彭蠡

揚帆過彭蠡遠見匡廬色瀑布天上來芙蓉望中碧東  
林鐘磬遠沾酒潯陽夕楓樹忽鳴猿淒然念鄉國

題諸葛孔明像

炎祚脩云季諸侯騁雄圖棲棲劉豫州三顧何勤渠漢  
賊不兩立一心抱區區臨崩寄大事忠憤常鬱紆鞠躬  
乃盡瘁賢哉此丈夫

釣臺懷古

新室篡炎祚中興復興圖故人即軒冕先生獨樵漁一  
出盡交態拂袖歸桐廬豈唯黃綺輩得與巢由俱我來  
訪遺跡高臺倚荒蕪醺酒酌千古悲風起天隅



銅雀妓

朝上銅雀臺夕弄管絃哀  
醺酒望陵樹悲風千里回  
飛縵挂青漢舞袖空徘徊  
君王不可見玉座成蒼苔

塞下曲

二首

橫行羽林兒生小邯鄲裏  
出塞入塞時顧勲寧顧死去  
年戰桑乾今年戰樓蘭  
馬上擒突厥帳下降可汗  
誰知百餘戰封侯竟艱難

登埤望烽火落日烟塵紫  
百戰久不歸空閨淚如水  
漢

兵十萬餘盡沒長城死城下有精靈啾啾月明裏

明妃曲

行行出塞門飲血思長安窮廬凍不暖雪飛邊草乾漢  
國空外歿秋霜鏡中寒金鑊煮羊酪強接單于懽夜半  
鴈聲急琵琶哀自彈

秋胡妻

河洲美王雎所託有深意委身事良人誓死終不二君  
行赴陳汝妾獨深閨裏采采陌上桑翩翩路傍騎黃金

是何物視之若泥滓  
日夕采桑還行人已歸  
止入門拜高堂  
適來狂馳子相顧  
默無言懷慚復何已  
羞與斯人俱將身赴河水

妾薄命

妾家叢臺下花顏耀青春  
嫁得金吾壻飄飄事邊塵  
昨聞羽書至陣歿交河濱  
戰馬委沙磧兵符屬他人  
念此每欲死淋浪淚沾巾  
羅襦為君解瑤瑟不復陳  
始信古人言容華多誤身

遊天台國清寺

飛步赤城標連峰積空翠  
杳靄蔥蒨間千秋隱靈異  
石橋孤鳥外香界清暉裏  
羣壑歸雲遙林引寒吹遂造  
豐干廬垂蘿覆溪外真僧五  
百人了了西來意願此學  
無生超然謝塵滓

尋清冷臺訪洽上人

端居在入境久沒塵壤中  
探奇不憚遠於焉得佳逢  
石怪亘森列臺高絳虛空  
林端宿雲去竹外微逕通  
巖壑

深杳靄天花雨蒙茸洽師禪門秀戒牒同古松說法超  
上乘苦心歸妙宗予慚善根淺迷方莫能從暫此松下  
石聊踈浮世蹤

秋塘曲

妾家住寒塘夫壻平原客白馬五陵遊空閨斷行跡憶  
昨別君時蒲生柳條碧及此君不歸登艫感秋色

悼隣婦

入江水有魚采山林有木栖栖東隣婦悲涼守空屋年

荒鬻釵釧服食恒不足雖有膝下兒身為富人僕浮生  
幾何時奄忽風中燭一旦壽命終蕭條但牀蓐骨肉已  
不收親情復誰哭徒然束縛去瘞彼沙岡麓為問里中  
豪疇能問窮獨姬文昔埋齒千載耀芳躅

擬古

明月照我室攬衣起中堂北風卷帷幔羅襪微有霜崇  
蘭委芳質寒蟬啼近牀平生所親者宛在天一方相思  
無由理況此寒夜長單居易為感不覺涕沾裳

暮秋過陳氏園林

幽人棲隱處苔徑連深曲  
秋至垂橘黃霜清大梨熟  
方池汎天影可以澄心目  
飲水共忘形何須徇榮祿

舟次鍾津

木落川氣涼鴻飛水容夕  
微燈射遠沙夜榜隣幽石  
月色棲處寒霜花生來白  
遙見九華峰蒼蒼但蘿薜

書上方方壺醉墨山水

林下多白雲溪日饒水木  
長嘯鸞鶴羣悠然在空谷  
悠

悠山色間浩浩波光綠寄醉墨壺中唯應道機熟

與同志汎舟得淨字

登艫發清嘯落日鏡湖淨微月波上澄歸雲鳥邊迴水  
木生夏涼孤崖破陰暝矧茲簪珮同復此滄洲興中夜  
棹歌還遙峰響烟磬

秋日山行

清秋發佳興著屐窮翠微鳥度黃葉澗猿啼白雲扉野  
寺隱孤磬遙峰當夕暉浮雲淡空宇石瀨清心機緬懷



蘇門嘯願拂林中衣長歌望薜蘿思與塵世違

獨酌言懷

林居絕輪鞅獨酌形亦忘百年會衰朽一室任荒涼  
寤寐友千古游心見羲皇所以陶潛翁頽然卧柴桑

九月一日過崇信蘭若

荒山響清梵竟日無行跡釋子支遁流相逢澹空寂  
雲歸天際閒鳥度林中夕境淨秋色多心遠羣機息  
妙契兩忘言微鐘出蘿薜

送林漢孟遊溫陵

月出螺渚寒扁舟水容夕獨樹起鳴猿遙山帶行客清  
源鐘磬音金粟烟蘿碧高唱人莫酌探幽向禪寂

送別

雞鳴海氣白驅馬臨長陌遠樹帶鳴蟬孤城對行客蓬  
蒿我蕭然萍流子何適相送獨銷魂青山澹寒色

仲秋送人之塞上

河洲始鳴鴈白露沾我衣念子背鄉國秋風度金微舉

頭見黃葉條忽四散飛如彼遠遊子飄泊何當歸人生  
無百年會面安可稀行當慎霜霰皓首以為期

雨中懷瓢所

積雨抱幽獨齋舍何寥寥緬懷博陵子飲處唯一瓢濯  
足雙澗深行歌七巖遙如何在城市巾舄生塵囂蕙草  
日已萎松花日已凋相思不可見夢落寒江潮

夏日過憩天王寺

炎暑不可度端居日方永同袍四五人共愛山中靜飛

閣軼氛埃叢林逗蘿逕潭靜熱已秋竹深午猶暝初沿  
雙溪轉稍入空中境婉婉林鳥聲悠悠野僧定平生好  
幽玩盡日愜佳興山水發清機風泉澹初性日夕徐徐  
歸雲間響孤磬

經友人故宅

策馬孤城下經過淚盈襟閒門絳蠨蛸井竈莓苔深念  
彼泉下人悽然杳難尋蕭條故籬菊識我平生心攬轡  
向前路徘徊出寒林誰知山陽笛惻愴猶至今

送別陳平叔歸黃山

置酒鴈峰上，酣歌豁冲襟。  
臨觴不盡醉，何以慰我心。  
望遙天，雲蒼蒼，遠州樹落日波上。  
風殘鐘鳥邊，嶼此別。  
雖未遠，重來復何時。  
論交愧知己，握手翻成悲。  
君卧黃山雲，我弄滄洲月。  
雲月兩悠悠，相思坐超忽。

連川醫者許得明悠然樓

樓居結遐想，高超世人羣。  
冥栖寄寥廓，心遠遙天雲。  
恬目見歸鳥，夕嵐浮氤氲。  
清暉曠無際，攬之不盈分。  
緬懷

沉蛟井金繩閱苔紋靈貺亘千古英聲耀前聞以言岐  
黃秘稽首長桑君毋令上池水獨浣靈臺焚

題松陵吳文剛長春軒

習隱向微道了然玄牝門口含金鵝葢身寄桃花源結  
宇閱青陽寒林變氛氲逍遙太和際發生靈臺根結想  
夢岐伯飛聲繼軒轅希君黃芽秘永矣駐精魂

清江散人為林孔逸寫前林過雨圖

清川帶長林雨後宜水木澹沲天影寒孤光霽人目歸

雲澹空青虛窻響懸瀑日夕山氣佳心閒道機熟烟際  
下遙鐘西巖數峯綠

寒夜宴集陳拙脩西軒

飛霰夜虛集寒飆鳴近林感君玉壺酒微昏忽盈襟中  
庖出豐膳劇飲成謳吟賓言無多酌主稱宜再斟人生  
亦奚為所願長盍簪何必候離間臨風想徽音顧慙悠  
悠者辱此惠愛深窮匱不能答嘿嘿以銘心

書懷寄所知

欽定四庫全書

關中十字詩  
卷十五

九

孟冬天氣肅北風何淒涼引領望江介凝霜沾我裳非  
無越鄉感別久以為常終懷首丘念欲往川無梁越鳥  
辭舊林燕禽正南翔清川去悠悠離心日已長盛年不  
再至玄鬢忽已霜駕言適皇邑遠結金與張片言不合  
意東還守空堂因書訴知己恨恨中自傷

題郭熙水墨為陳滄洲作

飛流積天鏡勝寄來花源尋林烟露晚掃石泉蘿偏瑩  
神庶遺境歷寂焉累煩身與鳥共遠興將雲獨還以來



滄洲侶永矣洗心言

題林彬家畫

谷口翠微路深溪明藥叢宴林侯巾舄卷幔來羣峰心  
遠魚鳥狎跡幽猿鹿同行當復徙倚杳靄東林鐘

送鄭上舍縉省親之朔州

解薛受圭組分符撫黎甿何意五馬榮翻垂縵胡纓持  
法在權貴皇仁無此情狂歌夷門道感激誰為平驅車  
在宛洛悠悠念徂征恒山鬱空翠晉水空流聲部曲不

相讓嫖姚豈知名爾去且勿嘆寧親向邊營何必兒女  
別臨岐淚縱橫

送新寧簿丹徒劉公之天官

翩翩瑤臺鳳鳴聲何噦噦本期金琅玕暫爾栖棘叢誰  
云小千室守道隨污隆三考未遷秩一官恒屢空茲晨  
復辭滿祖道嘶華驄荔支雨江邨榕葉風輜軒上  
京口坐聽金陵鐘到家未幾日謁帝明光宮余亦彈冠  
者何由托冥鴻

九日宴集盤石得諸字

商飈號大野蕭索如孟諸落日送飛鴻千巖寒木疎置  
酒登嘯臺雲蘿極空虛酣歌醉僊菊列坐飄長裾身寄  
猿鳥外神遊元化初飛聲瑤池鳳遠致麻姑書遙海上  
孤月寒潮帶歸魚天空百泉響獨鶴哀有餘不見松柏  
路蒼蒼閉玄廬誰知委運去千載隨荒墟且復酌美酒  
揮刀膾雙魚人生非喬松不飲當何如

歲宴別施伯予還冶城甥館

沂泗不可極河汾亦悠悠真源了無跡誰知邈其流愛  
爾尚苦節擔簦適來遊披荒得微路稍見窺前修爾家  
新寧墅來往冶城秋夜雨夢甥館殘燈憶家樓臘日湖  
上別北風吹布裘寒山對綠酒大雪飄行舟我有跌宕  
懷翻然積離憂臨歧嘆孤鳳去去鳴丹丘

寄新寧林伯堅秀才

三峯過殘雨獨樹冥返照鳥外尋片雲霞邊發孤笑若  
人滄浪心掛席凌海嶠白社偶香緣清江隱漁釣緬懷

中林期負我蘇門嘯榮賤非所知君其可同調

贈德成巖道者

巢居迥無跡浮人豈知名振文掇霞采孤坐白雲英神  
閒了遺境欲澹將寡營標枝與野鹿邈然兩忘形適來  
本何期脩別寧鍾情長嘯忽歸去啾啾鸞鶴聲

又

巖栖帶靈境寥寥布金園足然足音少所遇麋與猿井  
竈白雲裏枕席莓苔痕懸燈夢石榻蝙蝠飛前軒腹中

楞伽經心解口不言衆方委塵劫此獨來真源筍笠掛  
絕壁卷衣弄潺湲夜半月出山泉蘿四垂門了然忘天  
地獨與靜者論

題閩清林叔梅林畊隱卷

結宇隱空翠耦耕梅花林羣嶺寄孤鳥衆溪澄一心春  
至覘泉脈遥遥西頂岑黃緣片雲上杳靄窮源深潭雨  
颯已至虹蜺生胸襟翩翩洪崖子采藥青蘿陰手持若  
木杖笑拂丘中琴以言得仙道豈必服黃金言既忽飛

去諸峯龍夜吟榛篁閔秋影石洞聞幽音翹首望不及  
蒼然何處尋還歸理吾稼寧用競華簪

夢遊武夷吳十董大客建上

夕發紫霞想神遊紫霞峯迴飈汎輕棹九曲青芙蓉不  
見武夷君幽溪但濛濛九函閔仙蛻千載如花紅白鹿  
行不返丹樓烟靄中羽士尚控鶴真人猶褰龍相攜三  
姑石眺晚聞霜鐘毛竹隱初月天雞鳴萬松蒼綠金梯  
上更歷千數重雙壁忽中斷氤氲垂藥叢平鋪亘百里

曠遠諧心胸居人半雞犬鼎竈并房櫳雲衣卷山罽石  
牀疑鬼工洞中兩神女瑩色桃花容一笑粲玉齒再言  
情已通願留就金液果然慚奇逢愁君乏仙骨茲去迷  
靈蹤

題馮公夙家藏方壺神嶽瓊林圖

吾愛方壺子翩翩列仙流曠津結龍虎逍遙與天遊有  
時發仙秘戲掃瓊林秋超然粉墨外坐使真宰愁茲峰  
表神嶽漫漫元氣浮祥飈轉琪樹蕭颯珊瑚鉤玄鳳隱



朝景三花媚靈湫伐毛紫霞裏濯足泉蘿幽黃金變綠  
髓千歲栖霞丘世人哂丹汞飯稻甘蟬蛸披圖有遐想  
其將方外求

林思器席上燕別高漫士得思字

月出東大堤含輝正流麗同心以綢繆何乃生離異置  
酒登高臺臺中管絃思臨觴不能御恨恨心已醉憶昔  
俱少年眷言不相棄及茲別離時衰境倏已至念君遠  
行遊嚴駕越淮泗阿閣入雲中皇居儼迢遞京邑多故

人誰為顧微細恨無晨風翰隨君發遐裔浮雲東南翔  
夕景忽西逝安能守窮賤皓首以遺世

題林漢孟瓢所

東林富猿鹿下有靜者廬四壁無長物一瓢常晏如青  
蘿覆虛牖落葉紛前除初疑許由室終類顏子居飯糗  
常自樂飲泉非顧餘雙澗時浣衣七巖閒著書何須洗  
雙耳始與塵事疎

贈周谷泰超召天京

王風變諸夏光嶽生才彥遂令布衣臣歛起皆纓弁馬  
卿寧久微甯戚豈長賤扈從甘泉宮承恩未央殿金陵  
鬱龍虎佳氣浮蔥蒨天子坐明堂羣公牧州縣奇君個  
儻懷而無故鄉戀恥學兒女仁含悽別親串綠水映行  
輶青山對華餞茲去復何辭皇情有深眷

方壺漁隱圖

滄波深不極孤棹獨容與白髮尚漁竿何心戀珪組脩  
然水木興浩蕩沙鷗侶回首莓苔峰蒼茫夜來雨

題鄭氏家藏古畫

涼雨靜氛壒孤雲結層陰飛流激荒澗嘉木澄幽林鳥啼谷中靜人閒川上心誰為後來者當期此投簪

題山水小景二首

習靜喜還山山水趣方永灌木澄幽陰風泉溜華頂清聽空外遙吾心坐來醒

空山落葉時渡口潮初長遠樹帶虛亭閒雲霽孤舫古路今人行浮生幾回往

書問耕堂

龐公喻劉表仲尼小樊遲為學貴自廣遺安亮無危若  
人隱耕稼取樂寧在茲用舍隨所遇榮賤心弗移閉門  
面場圃開軒矚清池棕葉覆我牖藤花垂我衣方春始  
微雨薄言往東菑田叟既相勉耰種恒及時稻苗日已  
長稂莠日已稀遠心易無悶悟物兼忘疲雖云體力倦  
斗酒聊自怡伐檀夙有戒素餐良可譏豈不羨微祿知  
命復奚疑

次韻奉會鄭助教

涼雨淨炎燠微風松下來  
眷言青雲客晚晚滄洲懷翰  
墨冠時輩風流傾衆才  
高情表千仞逸足凌三台  
既欣簪佩狎復與緇錫諧  
清言方屢接又恐心期乖  
袒褐逐漁釣衡門翳蒿萊  
寧知枉高駕酌我中林盃  
盡醉無復辭俱忘形與骸

書金碧山水

羣峰絢金碧積水澄天鏡  
灌木生夏涼孤雲破朝暝  
波

深魚鳥同地遠衣冠勝意愜遂忘機神閒庶遺境擾擾  
塵坭中吾將弄烟艇

書林良箴雲山幽隱圖

滄江湛迴流野樹帶遠色白雲東山來適與幽興集靜  
撫丘中琴時散林下帙余亦澹蕩人相期此投跡

為林中州題山水小景

離居雜塵想久別山水深茲然愜清玩復得諧夙心積  
雨川上霽蕭蕭楓樹林空翠灑飛閣孤雲閒遠岑若人

此真隱絢帙與瑤琴悵望獨不見空期鸞鳳音

書高漫士為陳容齋作山水圖

落景逗秋思深潭澄夕氛金梯拂蘿月苔泉鏡中聞但  
覺靈境幽都無浮世紛白鹿知我閒呦呦清溪瀆焚香  
鬼谷瞑輟棹花源分瑩神寫冰絃石牀夢氤氲而我烟  
霞侶今隨鸞鶴羣唯餘瑤華音山水同清芬華頂何寥  
寥我行多白雲長歌採三秀不堪持寄君

題畫二首



三十卧雲壑長吟招隱篇梯巖結幽構鑿石開山田時  
往翠微峯捫蘿拂青天脫巾掛脩竹酌酒揮五絃別來  
如蓬轉茲賞竟茫然白首竟垂釣蕭條東海壖徒有鷺  
鶴心終無黃綺緣今晨展圖畫因以思林泉何時還舊  
隱遂買秋江船

鷗冠飯雕胡分與時人淺道存心自玄豈必泉蘿遠綠  
水淨鳴琴空林對虛館山中春桂枝脩爾飛霜滿寄語  
青雲人投簪事應晚

題林景時水墨山水

向壁見空翠滿堂烟靄生都無粉墨姿但覺泉籟聲  
爾丘中賞沿源結幽盟間尋天牕外偶拂青蘿行身與  
雲共遠心將猿獨清予亦澹蕩人因之謝浮名願餐金  
鵝蔬飛步窺蓬瀛

書周造士扇頭

極浦澹野姿遙峯寫脩眉清暉襲房櫳綳帙生華滋嘉  
爾日在泮還山仍下帷唯應結幽興與我琴心期

贈別陳少尹思孝服闋之天官

晨登無諸臺南望冶城闕垂楊夾衢路一日幾人別行人  
惡離別僕御愁不發斯須竟參辰况迺千里訣行人  
難久留結駟登瀛洲連宮出閭闔上有佳氣浮鵲鵲麗  
飛觀銅龍起高樓結託盡中貴經過皆列侯侯家連戚  
里日夕歌鐘起金貂錫元勲赤舄何几几宦遊良不惡  
冠蓋相縈絡誰懷長卿貧沉疴守藜藿

初秋同叔弢彥時遊崇山蘭若

習靜厭紛擾幽尋給孤園翛然香林下似得桃花源一  
鳥落天鏡千花秀禪門紛吾道機淺謬接甘露言月色  
隱秋思荷香清夜魂終希偶緇錫永矣超塵喧

為醉樵書水墨扇頭

入山不辭遙愛此泉蘿僻悠然與心期孤雲澹而白谷  
神養玄牝應寂了空色思與靜者諧投蹤寄苔石

題高漫士山水圖

山郭雨新霽孤雲濕猶飛嵐嶺隱空翠石林閒清暉時

與同心人逍遙愛荆扉都無浮世累共我飯薺薇日夕  
笑分去微風拂蘿衣

虛白子水墨圖為陳思考題

開圖見嵩少妙趣忽已領濛濛花源陰窈窕多靈境石  
洞閉苔紋天窻逗雲影迎秋鷗冠涼先雪荷衣冷長夜  
何所聞龍鳴在西嶺

書陳思孟家藏古畫二幅

勝寄結幽夢遠林適孤尋澹然花源裏杳藹雲木深胸

次不礙物但聞丘中琴唯應棄瓢者永言諧夙心

又

絕壁凌仙梯連峯出孤鳥天虛靈籟寒月隱泉蘿曉長  
嘯入蘇門跂然足音少

賦得雲溪別棹送憲從事赴京師

手折臺上栢送君天外心雲飛隔溪水望望隔層岑仙  
棹去俄頃滄波杳難尋行將拂霄漢發軔當在今我有  
千古懷寄情江海深別離貴有驥愧無雙南金

題劉炷家藏畫

秦人避囂處雞犬桃花林水石隱天鏡泉蘿聞夜琴紛  
吾厭氛塏欲往路彌深永懷蘇門嘯邈然塵外尋

書水墨圖

嵐嶺闕幽構清暉長在門閒尋鬼谷隱杳靄迷仙深灌  
木遞蔥蒨飛蘿垂可捫豁然心境異邈爾朝市喧苔際  
坐亭午微颺散氤氲迴潭浣余衣馥芳佩蘭蓀綠水深  
見底澄明瑩心魂孤雲石上起與爾俱無言

題高廷禮為陳拙脩繪滄洲隱

我昔放仙島夢神東海濱行歌小山桂遂偶滄洲人結  
交龍門子招邀浮丘生都無簪冕繫而有山水情浮丘  
逐銅輦龍門登玉堂瞻然滄洲隱與我啗滄浪有時獵  
羣書宛在竹深處境靜不遑眠中宵啓前戶龍門惜睽  
離故寫無聲詩別後見雲樹相思但悽其

偶書醉樵扇頭

幽谷夜來雨遙岑積鮮雲山光與潭影清暉并在君佳



期發琴興念爾鸞鶴羣何為解蘿薜悵然坐離分

游竹林深處因贈拙歸居士

深林霽初霽氤氲逗蘿逕煩歎遍朱火愛此山中靜拂  
石雲共眠橫琴鳥皆聽神閒境自玄物澹心逾迴超然  
維摩居水月初見性行人苦未歸巖棲獨清淨

建安王彥真善墨竹道遇新寧林彥時寫歲寒

烟雨為別索余就題其上

黃鶴久為別蒼茫雲海涯青鸞爾何來婉孌湘山期烟

雨變叢色虛心獨華滋於焉晚節勁豈逐春華萎二十  
五清絃一絃一悽其驚驚復分去鶴怨仍傷離縱使鸞  
鶴悲終歸集瑤池梧樹秋不實天霜落寒威誰能慰孤  
鳳日夕恒苦饑緘情寄幽夢憶君蒼簣枝

題畫扇面

山空水雲淨月出洲渚白寒葦梳幽風孤蓬逗秋色垂  
綸久忘魚擊汰非干澤終愧坐磻溪皓首釣人國

送陳和中赴召

河洲發仙舸明日過鍾津云是金臺客西遊謁紫宸乳  
酒白玉壺送行多親賓酣歌供帳下策馬長江濱越水  
碧到海楚山青入閩揮手謝余去遙遙動車塵二月金  
陵道千花白門春皇居九天上簪紱羅羣臣飄飄雙鳳  
侶追隨五龍賓日夕飯琅玕毋為凡鳥嗔茲行必特達  
飛書報鄉人

餞林一峯負譴赴京師

澤國敷春鴈風花送離筵揮觴念行子驅車發閩川秉

筆事藩府辭家已三年何知公治繫徒使尼父憐翹首  
白雲岡含悽鵲鵲篇回林顧天屬遠道同周旋白璧非  
不貴精誠合其天明當抵京邑秦臺鏡高懸含恩沐春  
露發興歸秋田故里足禾黍西崖好林泉選幽拂霞座  
尋雲謁金仙閒來結吟社暫割寰中緣

雨夜舟中作

落月浮洞庭霄分逗烟舸側聞巴陵鐘遙愛君山火片  
雨潭上來涼聲滿高臥龍鳴秋籟寒蛟泣靈珠墮瑤瑟

何悽其蒼梧曉來過誰能問重華空鼓瀟湘柅

哭滄洲陳景明處士

盥櫛中夜起悲謠淚盈襟銜哀思明哲徒有不死心昔  
來論久要落落襟期妙當以古人求今人少同調君家  
足文獻勝事令人羨脫畧遠膏腴追隨狎貧賤出入戀  
同聲去留無吝情爭聞柳下風競播栗里名平生愛精  
獵著作多盈篋晨抄不輟手夕誦未交曉客來即命觴  
謔浪如踈狂醉後又分詠敏捷皆成章有時忽得句夜

半扣予戶開門見月明相邀到天曙心跡兩悠悠功名  
無所求共吟蕭寺雨同醉鏡湖秋長懷武夷趣欲往嗟  
遲暮終羨子長遊空憐向平去我本東西人移家託芳  
隣綈袍意所戀尊酒情益親銘鐫向心骨條爾驚存歿  
開函見遺書迸然涕俱出憶昨登洪山徘徊蒼翠間俛  
仰遽云歿玄廬竟掩關吞聲不能道感激滄洲皓悵望  
無還期滄洲長春草

閩中十子詩卷十五